

Frá Sambandi ísl. sparisjóða

Alþingi
Erindi nr. P 139/ 833
komudagur 8.12.2010

MINNISBLAÐ

Til: Sambands íslenskra sparisjóða

Frá: Landslögum

Dags. 1. desember 2010.

237. mál

Vísað er til tölvupósts, dags. 30. nóvember 2010, þar sem óskað var eftir tillögu um orðalag og staðsetningu ákvæðis um tryggingasjóð/öryggissjóð sparisjóða sem hægt væri að leggja fyrir viðskiptanefnd Alþingis við meðferð frumvarps til laga um innstæðutryggingar og tryggingakerfi fyrir fjárfesta, en í því frumvarpi er lagt til að ákvæði um heimild viðskiptabanka og sparisjóða til að stofna öryggissjóði verði felld niður.

Meðfylgjandi er tillaga að slíku ákvæði. Lagt er til að það verði í 70. gr. laga um fjármálafyrirtæki, þ.e. í lok VIII. kafla þeirra laga um sparisjóði. Texti ákvæðisins byggir að mestu leyti á því ákvæði sem nú er í lögum um innstæðutryggingar og tryggingakerfi fyrir fjárfesta.

Tillaga um breytingar á lögum um fjármálafyrirtæki, nr. 161/2002, með síðari breytingum.

Við lögina bætist ný grein er verður 70. gr., svohljóðandi:

Sparisjóðum með staðfestu hér á landi er heimilt að starfrækja öryggissjóð sem allir sparisjóðir skulu vera aðilar að. Tilgangur slíks sjóðs skal vera að stuðla að fjárhagslegu öryggi sparisjóða og þar með tryggja hagsmuni viðskiptamanna.

Öryggissjóður skal vera sjálfseignarstofnun. Aðalfundur setur öryggissjóði samþykktir þar sem kveðið er á um starfsemi hans. Skulu samþykktirnar háðar staðfestingu ráðherra að fenginni umsögn Fjármálaeftirlitsins. Öryggissjóðurinn er undanþeginn greiðslu tekjuskatts, eignarskatts og fjármagnstekjuskatts. Sama á við um aðra skatta sem byggjast á sömu álagningarstofnum. Þá verður sjóðurinn hvorki tekinn til gjaldþrotaskipta né er heimilt að gera aðför í eignum hans.

Öryggissjóðnum er heimilt, í því skyni að tryggja fjárhagslegt öryggi sparisjóðs, að veita sparisjóðum stuðning m.a. með því að veita lán eða yfirtaka ákveðnar eignir, gangast í ábyrgðir, veita víkjandi lán, bæta sérstakt tap og kostnað sem sparisjóður hefur orðið fyrir eða ráðast í aðrar þær aðgerðir sem stjórn öryggissjóðsins ákveður í samræmi við ákvæði laga og samþykktar sjóðsins. Í þessu skyni er öryggissjóðnum heimilt að láta rannsaka rekstur og efnahag sparisjóðs. Getur stjórn öryggissjóðsins í því sambandi krafist nauðsynlegra upplýsinga frá hlutaðeigandi sparisjóði.

Aðalfundur fer með æðsta vald í málefnum öryggissjóðs. Sérhver aðili að sjóðnum fer á aðalfundi með atkvæðisrétt í samræmi við hlut sinn í heildareignum sparisjóða. Stjórn sjóðsins fer með málefni hans á milli aðal- og aukafunda. Hún skal skipuð þrem mönnum og skulu tveir stjórnarmenn og jafnmargir til vara kjörnir á aðalfundi til eins árs í senn, hlutbundinni kosningu ef óskað er. Ráðherra tilnefnir einn mann og skal hann tilnefndur til þriggja ára í senn. Nánar skal kveðið á um skipan og verkefni stjórnar í samþykktum.

Stjórnarmenn og starfsmenn öryggissjóðs eru bundnir þagnarskyldu í samræmi við ákvæði laga um fjármálafyrirtæki.

Fjármálaeftirlitið hefur eftirlit með starfsemi öryggissjóðs. Um eftirlitið gilda að öðru leyti lög um opinbert eftirlit með fjármálastarfsemi.